



KOMUNIKADO DI PRENSA 2016-005

Willemstad - Banko Sentral a tuma nota di un artikulo ku a sali publiká den un matutino dia 31 mart ultimo tokante un kontrakt ku Banko Sentral a sera ku e kompania Merikano Livingstone Group. Den e cuadro aki Banko ke duna e siguiente informashon:

Korsou y Sint Maarten komo pais chikitu y ku un ekonomia habrí ta dependé di komersio internashonal pa asina importa entre otro alimento y otro produkto nesario pa nos bida diario. Gran parti di e importashon aki ta bini di Merka. Pa finansiá e importashonnan aki institutonan finansiero (bankonan komersial) ta mantené un relashon di koresponsal ku bankonan estable sí na Merka. Aparte di esaki Korsou y Sint Maarten, komo sentro finansiero internashonal, ta mantené e relashonnan aki ku bankonan koresponsal Merikano pa sirbi nan klientenan. Esaki ta parti di e posishon kompetitivo ku Korsou tin pa ofresé institutonan finansiero internashonal ku ta estable sé na nos pais.

Ultimamente outoridatnan Merikano a bini ku hopi reglamentashon (despues di 9/11, komo medida kontra labamentu di plaka, finansiamentu di aktividatnan di terorismo y inkumplimentu ku sashonnan ekonómiko ku Nashonnan Uni of Merka imponé riba otro paisnan) ku e bankonan koresponsal mester tene nan mes na dje. Bankonan ku violá e reglanan aki ta haña multa pa montantenan astronómiko. Komo reakshon di e politika aki, bankonan Merikano a kuminsá ku un polítika pa minimisá nan riesgo dor di terminá e aktividatnan di banko koresponsal ('de-risking policy'). Region di Karibe, inkluso Korsou i Sint Maarten, ta enfrentando difikultat di e politika aki.

Aproksimadamente 80% di importashon di Korsou y Sint Maarten ta bini for di Merka. Por lo tanto e relashon koresponsal ku bankonan Merikano (pa fasilidat pagonan internashonal) ta di vital importansha pa nos sobrevivensia y aktividatnan ekonómiko. Sin e kontakto aki praktikamente e pais ta keda isolá di sobra di mundu y lo no por hasi transakshon finansiero internashonal ku tur konsekuensha ku esaki tin pa nos ekonomia y bienestar di e pais. Ya diferente banko internashonal a bandoná nos hurisdikshon pa e motibu aki.

Sektor finansiero, tantu lokal komo internashonal, a aserka Banko Sentral pa buska un solushon pa e problemátika aki. Den e cuadro aki Banko Sentral y sektor finansiero a yega na un akuerdo pa kontrata konhuntamente e firma Merikano, The Livingston Group, pa asistí nos pa yega na un solushon di e problemátika aki. E kompania ta konsistí di personanan ku eksperensia den tantu

governashon komo legislashon Merikano. Sr. Livingston por ehempel, tabata presidente di kámara di representante Merikano ('US House of Representatives') pa e partido republikano, mientras su kolega Lauri Fitz-Pegado tabata minister di komersio den gabinete di presidente Clinton.

E problema di banko koresponsal ta un problema grandi pa area di Karibe. Mirando e importansha di e topiko aki pa Karibe próksimamente lo tin un enkuentro entre departamentu di Tesoreria Merikano ('US Treasury Department') y mundu finansiero Karibense na Jamaica.

31 di Mart, 2016

CENTRALE BANK VAN CURACAO EN SINT MAARTEN